




宋黃文節公文集卷之二

五言古

郵下喜見八叔父

元豐三年改官都下作八叔父即夷仲給事時為集賢

校理判尚書刑部

一別七冬夏幾書通置郵冥鴻難借問江鯉多沉浮
心因夢想去迹為山川留叔趨丹鳳闕身向卧龍洲
邂逅入關馬同時解轡鞅別後事萬端向來身百憂
咨嗟舊田園慟哭新松楸稍詢耆舊間大半歸山邱
小兒攜婦子襁褓皆裹頭清燈照逆旅呼酒濯亂愁

破啼為笑語霜夜盡更籌歲寒叔舊節况又高春秋
老松心梗槩綠竹氣和柔言如不出口體若不勝裘
德音潤九里政事無全牛詩成戲筆墨清甚常蘓州
篆籀有志氣當於古人求自悲聞道晚涉世如虛舟
雖無觸物意儻亦遭罵咻稍窺性命學未窮言行尤
息心待自信渺如大河流隄防小不密一決敗數州
安得心服禮不見為瘡疣荆鷄變化材鵠卵滯陰幽
願因啄抱力浩蕩碧雲游

螢註按國史元豐三年夷仲給事除權發遣河東
提點刑獄公事兼提舉義勇保甲公改官入汴與

之相見其一別七冬夏句當是熙寧間公在北京
給事嘗體量河北河東災傷道經由相見至此十
年耳

次韻答叔原會寂照房呈稚川

客愁非一種歷亂如蜜房食甘念慈母衣綻懷孟光
我家猶北門王子渺湖湘寄書無鴈來衰草漫寒塘
故人哀王孫交味耐久長置酒相暖熱愜於冬飲湯
吾儕癡絕處不減顧長康得閑枯木坐冷日下牛羊
坐有稻田衲頗薰知見香勝談初疊疊修綆汲銀床
聲名九鼎重冠蓋萬夫望老禪不掛眼看蝸書屋梁

韻與境俱勝意將言兩忘出門事袞袞斗柄莫昂昂
月色麗雙闕雪雲浮建章苦寒無處避唯欲酒中藏

按元豐三年公入京改官太和猶寄
家北京故詩中有我家猶北門之句

同王稚川晏叔原飯寂照房

得房字

高人住寶坊重客款齋房市聲猶在耳虛靜生白光
幽子遺淡墨窓間見瀟湘蒹葭落鳬鴈秋色媚橫塘
博山沉水煙淡與人意長自攜鷹爪芽來試魚眼湯
寒浴得溫溜體淨心凱康盤飧取近市厭飫謝羶羊
裂餅羞豚膾包魚芰荷香平生所懷人忽言共榻牀

常恐風雨散千里鬱相望斯游豈易得淵對妙濠梁
雅雅王稚川易親復難忘晏子與人交風義盛激昂
兩公盛才力宮錦麗文章鄙夫得秀句成誦更懷藏

次韻叔原會寂照房

得照字

風雨思齊詩草木怨楚調本無心擊排勝日用歌嘯
僧窓茶煙底清絕對二妙俱含萬里情雪梅開嶺徼
我慙風味淺砌莎幕松蔦中朝盛人物誰與開顏笑
二公老諳事似解寂寞釣對之空嘆嗟樓閣重晚照

次韻稚川

得寂字

平生萬里興歛退著寸尺向來類竊鈇少日已爭席
曩過招提飯愜當易為適食鮭如舉士名下無遺索
談餘天雨花茶罷風生腋誰言塵土中有此坐上客
言前傾許可曾次開埽塞同是蠹魚癡還歸理編冊
長安千門雪蟹黃熊有白更約載酒行無為守岑寂

竹軒詠雪呈外舅謝師厚并調李彥深

元豐元年
北京

作

破臘春未融土膏寒不發數聲鳴條風一夜灑窓雪
開軒萬物曉落勢良未歇鏗鏗青琅玕閱此歲凜冽

摧埋頭搶地意氣終自潔君子謂此君全身斯明哲
屋頭維女貞顏色少澤悅稍能窺藩籬亦有固窮節
佳興冉冉生門外無車轍寫之朱絲絃清坐待明月

丙寅十四首效韋蘓州

并序

二月丙寅率李原彥深謝惓公靜遊百花洲適為
遊人所擅見拒於晨門因賦何人有酒身無事誰
家多竹門可款之句行繫馬李氏園步至廣濟僧

舍

謁寇萊公祠用吏部韻
丙午朔序云丙寅二十一日也

宋史元豐元年二月
公靜師厚之子

雪霽草木動春融煙景和嘉辰掩關坐如此節物何

同游得二子晤對不在多

其二

不知鞍馬倦想見洲渚春
清晝鏤芳園誰家停畫輪
高柳極有思向風招游人

其三

漸嘉樓外花嘉賞亭邊柳
作者歸山卽今春為誰有
千秋萬歲後還復來游否

漸嘉樓陽夏謝希深
作嘉賞亭范文正作

其四

城南有佳園風物迎馬首
但賞主人竹不飲主人酒

紅日媚紫苔輕風泛青柳

其五

三公未白髮十輩乘朱輪只取人看好何益百年身
但願長今日清樽對故人

其六

江梅香冷淡開遍未全疎已有耐寒蝶雙飛上花頭
今夜嚴城角肯留花在無

其七

我思五柳翁解作一生事得錢送酒家便靜尋山寺

念我還如此翁應會人意

其八

庭空日色靜樓迥鐘聲遲
褐叟已爭席馴鴉更不疑
同來復同去竟別我為誰

其九

謝甥有逸興李髯非不嘉
苦思夢春草醉狂眠酒家
斯游無俗物傲睨至昏鴉

其十

寺古老僧靜亭陰修竹多
萊公作州日部曲屢經過

衆推識公面蒼石眠綠莎

其十一

盛時衆吹噓謫去衆毀辱不為公存亡幽蘭春自綠
欲書名相傳安得南山竹

其十二

昔公調鼎實指顧九廟尊郡國富士馬于今開塞垣
誰能起公死為國守北門

其十三

出身世喪道解綬饑驅我杯中得醉鄉去就不復果

豈為俗人言達人儻予可

其十四

少小尚狷介與人常不款
置身稍雍容遇酒輒引滿
自是鶴足長難齊鳬脰短

寄南陽謝外舅

元豐元年自假至
南陽歸北京作

謝公遂偃蹇南陽無舊廬
天與解纓紱元非傲當塗
庖丁釋牛刀衆手斫大輒
白雲曲肱卧青山滿床書

妙質落川澤果然天網疎
然知

一作
故知

今人巧未覺古

人迂築場歲功休夜泉鳴
竹渠胷懷鬱磊隗此物諒

時須兒能了翁事安用府中趨孫能誦翁詩乃是千
里駒人生行樂耳用舍要自如我方神其拙社櫟官
道樗公猶憂斧斤睥睨斲樽壺萬古身後前芭蕉秋
雨餘少年喜狡獪叱化粒成珠謨功可歌舞學古則
暖姝所好果不同未可一理驅眇思忘言對安得南
飛鳬鄙心生蔓草萌芽望耘鋤離筵如昨日春柳見
霜枯未辱錦繡段時蒙雙鯉魚憶昔參几杖雍容覩
規模引接開滌鑒高明通事樞門生五七輩寂寞半
白鬚談經落麈尾行樂從籃輿看竹辟彊宅閱士黃

公壚雪屋煮茶藥晴簷張畫圖幽寺促燈火青氎置
擣蕪遶床叫一擲十白九雉盧蔡澤來分功袁耽必
上都開旗縱七走破竹殄群胡成臬燭為明挾長朋
佐呼終飲見溫克所爭匪錙銖誰令運甓翁見謂牧
豬奴事託丈人重乃愛屋上烏舊言如對面形迹滯
舟車風簾想隱几天籟鳴寒梧尚喜讀書否還能把
酒無鄴城渺塵沙冠蓋若秋蕖相過問寒溫意氣馳
九衢楚客雖工瑟齊人本好竽永懷溟海量北斗不
可斟勝夜親筆墨因來明月珠

次韻正仲三丈自衡山返命舍驛過外舅師厚

贈答

熙寧十年北京作正仲名存師厚名景初

昏昏市井氣咕咕兒女語禽喧聲百種春作事萬緒
人間鷄黍期天上德星聚乖離略十年髮白齒齟齬
太史禱衡邱佐王用貔虎子雲免大夫草玄空自苦
人生只爾是付與甕頭醕

次韻謝外舅病不能拜復官夏雨眠起之什

元豐

元年北
京作

丈人養病卧此道取衆弃強飯尚可飽力田苦常匱